

ZAKON O KONTROLI CIJENA

Udruženje poslodavaca u FBiH aktivno učestvuje u konsultacijama u vezi sa pripremom i izmjenama Zakona o kontroli cijena, ukazujući na ključne nedostatke predloženih rješenja i njihov potencijalni negativan uticaj na tržiše.

Tokom sastanaka sa nadležnim institucijama, predstavnici poslodavaca posebno su ukazali na nepraktičnost i neprimjenjivost odredbi člana 7. tačke a), b), c) i d), koje predviđaju različite modele direktne kontrole cijena. Kao alternativu, predloženo je razmatranje rješenja zasnovanih na ograničavanju marži odnosno očuvanju postojećih odnosa u formiranju cijena (zatečeno stanje).

Udruženje poslodavaca u FBiH jasno ističe da fiksiranje maloprodajnih cijena nije održivo u uslovima tržišne ekonomije, te da takve mjere u pravilu dovode do poremećaja na tržištu, uključujući nestašice robe. Umjesto toga, predlaže se model ograničavanja marži, uz obavezno uvažavanje ekonomskih parametara kao što su operativni troškovi trgovine, koeficijent obrta robe i vremenska komponenta poslovanja. Naglašava se da svaki procenat ograničenja mora imati jasno utemeljenje.

Udruženje nema principijelnih primjedbi na mjere koje se odnose na kontrolu marži, ali se protivi bilo kojem obliku administrativnog određivanja maloprodajnih cijena, koje nije u skladu sa tržišnim principima i može imati negativne efekte, uključujući i potencijalnu neusklađenost sa ustavnim okvirom.

Također se ističe potreba da se ovim zakonom preciznije definišu kategorije potrošača kojima je zaista potrebna zaštita, kako bi se mjere usmjerile na najugroženije, umjesto da se primjenjuju univerzalno bez razlikovanja.

Udruženje zagovara savremenija i transparentnija rješenja, poput modela primijenjenih u sektoru goriva, uključujući digitalne alate i informisanje potrošača, što omogućava bolju tržišnu informisanost bez narušavanja konkurencije.

Posebna pažnja skrenuta je i na član 12. zakona, kojim se predviđaju široka ovlaštenja inspeksijskih organa. Udruženje smatra da su ovakva rješenja nepotrebna, s obzirom da su nadležnosti inspekcija već uređene važećim zakonima, te da ih je potrebno dodatno preispitati. Također, ukazano je na visinu predviđenih kazni, koje se ocjenjuju kao nesrazmjerne, uz rizik negativnih efekata na pravnu sigurnost i poslovno okruženje.

Iako predložena rješenja još uvijek nisu u potpunosti usvojena, Udruženje poslodavaca u FBiH ostaje pri stavu da je neophodno odustati od modela direktne kontrole maloprodajnih cijena te regulatorni okvir usmjeriti ka savremenim rješenjima zasnovanim na ograničavanju marži i tržišnim principima poslovanja. Udruženje će i dalje kroz direktan dijalog sa nadležnim institucijama, insistirati na unapređenju Zakona o kontroli cijena, s ciljem stvaranja stabilnog, predvidivog i tržišno utemeljenog poslovnog ambijenta u Federaciji BiH.